



• KEHEBATAN 'Seligi Tunggal' seperti yang dibuktikan oleh kedua-dua orang pesilat ini dengan gerak memukul dan mengelak yang tangkas akan hidup kembali di gelanggang baru.

Peluang utk pelajari seni silat orang2 Bugis 'Seligi Tunggal' bergerak semula

SETELAH kira-kira dua tahun setengah terkubur, perguruan seni silat *Seligi Tunggal* hidup semula.

Mulai sekarang siapa yang berminat boleh mempelajari penangan, gerak tangkas dan mengelak seni mempertahankan diri yang berasal dari orang-orang Bugis itu, di gelanggangnya yang baru di Sekolah Rendah Guillemard.

Persatuan Kemuning Singapura (PKS) yang dinaungi oleh perguruan *Seligi Tunggal*, telah diberi kebenaran oleh pihak sekolah tersebut untuk menggunakan gelanggang bola keranjangnya sebagai tempat latihan.

Senyap

"Kami telah bermohon kepada pengetua sekolah itu dengan pertolongan MP (Majlis Pusat Pertubuhan-Pertubuhan Budaya Melayu), dan permohonan kami diterima.

"Alhamdulillah, kini *Seligi Tunggal* dapat terus digerakkan dan dimajukan," kata jurulatih seni



• ENCIK MAWARDI
Kini '*Seligi Tunggal*'
boleh digerakkan
dan dimajukan.

tersebut, Encik Mawardi Iffi, ketika ditemui dalam majlis perasmian gelanggang baru itu Ahad kelmarin.

Menurut Encik Mawardi, perguruan *Seligi Tunggal* pernah terkubur sebanyak dua kali.

"Kali pertama ialah dalam 1981 apabila rumah saya di Fernhill Road dekat Stevens Road, yang menjadi gelanggang, terjejas oleh projek pembangunan. Pada waktu itu

kami bernaung di bawah Persatuan Bawean Singapura.

"Setelah senyap kira-kira dua tahun setengah, kami bernaung pula di bawah Persatuan Kemuning Singapura dalam 1983 dan mengadakan latihan di Hindhede Road, di Kampung Quarry, Bukit Timah.

"Tetapi tempat itu tidak begitu sesuai kerana terlalu jauh dan kegiatan kami diberhentikan sehinggalah ia dihidupkan semula sekarang ini," kata Encik Mawardi, 46 tahun.

Latihan perguruan itu dijalankan pada setiap Sabtu dan Ahad dan dibuka kepada semua, termasuk perempuan dan kanak-kanak.

Mereka yang berminat mestilah terlebih dulu menganggotai PKS yang mengenakan bayaran masuk sebanyak \$5 dan yuran bulanan sebanyak \$1.

Untuk mempelajari silat tersebut bayaran yang ditetapkan ialah \$1 bagi para pelajar dan \$4 bagi mereka yang telah bekerja.

Setakat ini perguruan yang baru dihidupkan semula itu disertai oleh lima orang pesilat yang pernah mempelajarinya dan 15 orang pesilat baru.

Perguruan itu akan bermohon untuk menjadi anggota kerabat Persekutuan Silat Singapura (Persisi) tidak lama lagi.

Seligi Tunggal, menurut beliau, dimulakan di sini oleh orang tuanya, Allahyarham Iffi Suhor, setelah mempelajarinya daripada seorang guru Bugis.

Bagaimanapun, mulanya silat itu hanya dikenali sebagai silat Seligi. Nama 'Tunggal' diletakkan pada nama asal itu oleh Allahyarham, memandangkan beliauah satu-satunya dalam sekumpulan murid guru tersebut yang akhirnya berjaya menjadi guru dan mengajarnya di Singapura.

10 DEC 1985
Dipelihara

Allahyarham meninggal dunia kira-kira tiga tahun lalu dalam usia 63 tahun.

Sementara itu, semasa berucap dalam majlis perasmian, Anggota Parlimen Eunus, Encik Zulkifli Mohammed, telah menasihatkan pesilat perguruan itu supaya menjauhi ajaran yang menyeleweng dan jangan mencampuradukkan silat dengan perkara yang menyeleweng.

Keaslian *Seligi Tunggal* sebagai warisan budaya Melayu, kata beliau, mestilah dipelihara.